

# 嶺南學報 Lingnan Journal (1929-1952)

Volume 11  
Issue 1 第十一卷第一期

Article 7

January 1950

## 何維柏與天山草堂

Y. C. SINN

Follow this and additional works at: [https://commons.ln.edu.hk/ljcs\\_1929](https://commons.ln.edu.hk/ljcs_1929)



Part of the Chinese Studies Commons

---

### Recommended Citation

洗玉清(1950)。何維柏與天山草堂。《嶺南學報》，11(1)，187-208。檢自：[http://commons.ln.edu.hk/ljcs\\_1929/vol11/iss1/7](http://commons.ln.edu.hk/ljcs_1929/vol11/iss1/7)

This Article is brought to you for free and open access by the Scholarly Publications of Lingnan University (Guangzhou) at Digital Commons @ Lingnan University. It has been accepted for inclusion in 嶺南學報 Lingnan Journal (1929-1952) by an authorized editor of Digital Commons @ Lingnan University.

# 何維柏與天山草堂

冼玉清

## 目 錄

- (一)引言
- (二)創建天山草堂之何維柏
  - 1.嘉靖朝之維柏
  - 2.隆慶朝之維柏
  - 3.萬曆朝之維柏
- (三)維柏里籍之考定
- (四)維柏與嚴嵩
- (五)維柏與張居正
- (六)維柏與東粵勝流
  - 滿若水 龐尚鵬 龐嵩 霍與瑕 黃佐 區益 陳遷 黎瞻
- (七)維柏與西樵山
- (八)維柏之理學
- (九)天山草堂存稿
- (十)天山草堂之沿革
  - 法性寺之天山草堂。天山草堂之取義。河南小港之天山草堂
- (十一)天山草堂之記載及其他
- (十二)天山草堂之題詠
  - 何維柏 龐嵩 潘有爲 何秉禮 趙均 陳曇 譚襄雲
- (十三)梁鼎芬與天山草堂
  - 附汪兆銓 陳伯陶 潘飛聲 吳道鎔 汪兆鏞
- (十四)結論

## (一) 引 言

從嶺南大學西行，經雲桂橋，度蜿蜒數十丈之水松基，約五里抵小港鄉。明直臣何維柏天山草堂遺在址焉。維柏以理學名儒，而生當嘉靖萬歷之世，君庸臣佞。乃慷慨陳言，抗疏直諫，置生死於度外。其効嚴嵩尙先於海瑞與楊繼盛此，吾粵正氣所鍾，不可不紀也。

世宗在位四十六年，溺志求仙，不視朝事。法紀廢弛，工作繁興。民力既耗，國力日竭。邪佞日親，諍臣日遠。小人乘之，陰伺喜怒，以排除異己。於是貞忠亮節之士蒙害者項背相望。若楊最楊爵，皆以直諫獲罪。嚴嵩媚上弄柄，益毒痛繙紳。若謝瑜葉經曾銑夏言沈鍊沈東楊繼盛，皆以忤嵩被禍。

神宗隆慶初，以徐階爲首輔。凡先朝得罪諸臣，以遺詔錄用，維柏曾再度還朝。及高拱執政，盡反階之所爲。乃以母憂歸里。萬歷初，張居正當國，勵精圖治。及居正亡，而萬歷弊政，一如嘉靖。誠如御史孟一脈所陳曰：『中外部章，不下部議。閣臣擬旨，不許糾駁。宸斷一定，莫敢犯顏。其弊一也。廉恥道喪，士習苟且，其弊二也。東南財賦之區，靡於淫巧。覃恩錫類，謁陵犒賞，耗費至鉅，民力困竭。其弊三也。戒備日弛，上下蒙閉。邊臣假貢市以賂戎，戎人肆剽畧以要我。彼此相欺，以誑君父。其弊四也。似此時局，自與維柏不能相容。惟有懸車天山草堂，以講學自遣。草堂既爲名儒遺蹟，又毗近嶺南大學。雖已被毀。其歷史價值有不可湮沒者。因詳考之，以告世之關心文獻者。』

## (二) 創建天山草堂之何維柏

### 1. 嘉靖朝之維柏

維柏字喬仲號古林，南海沙潛人。寄籍三水南岸堡（註一）生於武宗正德六年辛未（公元一五一壹）。甫四歲，見尊客輒端拱爲禮，客異之。嘗見同舍生臨祭而謔，輒引避以爲辱己，衆皆愧服，由是嚴憚之。（註二）少讀書於三水對城之崑都山以茅

覆屋，僅容一榻。日夜端默靜坐。澄心體認天理。至忘寢食。(註三)取周程諸子玩繹之，得其大旨。每言動稍忽，則曰得無與聖賢殊乎？(註四)嘉靖十年辛卯年二十歲，以胡一化榜選三水縣貢生。(註五)明年返南海原籍讀書西樵山古梅洞，日讀白沙集，思見端倪。時霍韜方獻夫湛若水亦山棲，常過訪洞中，語多默契。(註六)十四年乙未年廿四歲晉京。中韓應龍榜進士，選庶吉士。(註七)讀書中秘，益窺見精蘊。既而授御史。十六年五月戊戌雷震謹身殿，(註八)維柏上疏言四海困竭，所在流移。而所司擬加賦，民不爲盜不止。因請罷沙河行宮及金山功德寺工作，與安南問罪之師。(註九)(玉清案嘉靖十六年三月丁未，世宗發京師，視金山建築。是日宿沙河。禮部尙書嚴嵩因言沙河爲聖駕展視陵寢之路。宜建行宮，設官戒守。南衛神京，北衛陵寢。上是其議，命即日興工。見明嘉靖實錄 193:5)帝頗嘉納。毛伯溫丁父憂，世宗命其協理院事，維柏又上疏請聽伯溫終制。上謂其輒來奏擾，不許(註十)遂謝病歸，時年僅式十六歲。既歸復入西樵，與劉模王漸達陳激衷爲莫逆，往來講學。門人從遠方來者屢常滿。山居六載，至嘉靖二十二年癸卯，年三十二歲，復北上訪羅欽順整庵於南昌，以證白沙之學。日益精進。(註十一)曾集學子講學於南昌。(註十二)

嘉靖二十三年甲辰，維柏三十三歲，以御史巡按福建。值八閩大祲，福興泉漳尤甚。殍者載途。維柏條救荒十餘策，復出廩粟親率郡邑長吏賑濟，民賴存活者數十萬。(註十三)

廿四年乙巳，維柏三十四歲。在閩馳疏奏嚴嵩五罪，比之李林甫盧杞。世宗震怒，逮至京師下詔獄。拷掠備至。維柏在獄中與楊解山周納谿劉晴三人聚首甚洽。適都人傳有神降乩甚驗。上召至西苑狀鸞，問治世養生之法。判曰：『養生莫善於寡欲，治國莫重於惜才。』上默悟。維柏乃得從輕削職回籍。南歸，意氣自如，且賦詩有：『孤臣尚有生還日，聖德真同宇宙寬，』之句(註十四)

削籍後，家居二十二年，四方從遊者衆。大會於光孝寺，發明白沙宗旨。又開河南勝地爲天山書院，以處從遊之士。名所居曰天山草堂。(註十五)縉紳之士，即皓首猶北面而就弟子列。如尚書葉夢熊，僉事陳吾德尤以勵節著稱海內。(註十六)復教弟維椅成隆慶戊寅進士。(註十七)

維柏性純孝，家居常侍父通議公應初膝下稱觴爲歡。有餽佳味者，即白父延里中九老謙集。九老者：唐達齋明府年九十二，鄧沃泉副憲年八十六，周荔灣太守年八十三，周獅山明府年八十二，通議公應初年七十七，曾豫齋僉憲與江虛谷明府俱七十二，辛北崖通府與張惠齋二府俱七十一。維柏有詩云：『五仙舊在三城裏，九老今同一里間。春日盤蔬真率會，風流長得似香山。』（註十八）時嘉靖三十三年甲寅事也。

### （2）隆慶朝之維柏

穆宗卽位，改元隆慶。下詔自正德十六年以後至嘉靖四十五年十二月以前建言諸臣，遵遺詔存者召用，命吏兵部作速查開職名議擬具奏。（註十九）

正月庚申吏部開列先朝得罪諸臣，如通政使樊深御史何維柏等三十三人宜遵遺詔錄用。報可。（註二十）壬申陞河南道御史何維柏爲大理寺左少卿禮部左侍郎。（註二十一）維柏還朝，甚爲少師徐階，少傅楊博所敬重。大政多所取決。又上疏請上曰御便殿，召執政大臣謀政事，并擇大臣有才德者與講讀，儒臣更番入直。宮中燕居，慎選謹厚內侍調護聖躬。俾遊處有常，幸御有節。非隆冬盛寒，毋輟朝講。（註廿二）報聞，以是年十一月乙亥陞都察院左副都御史協理院事。（註廿三）

二年正月吏科給事中石星條六事，上怒以爲惡言訕上，命廷杖六十黜爲民。（註廿四）於是言事者之氣漸沮。七月大學士徐階乞休，許之。（註廿五）維柏與階最相善。階去，柏亦不能安。值丁母憂，遂去官還廬墓側。時維柏五十七歲。

### （3）萬曆朝之維柏

隆慶六年五月十日，神宗卽位。翌年改元萬曆。詔告天下凡嘉靖四十五年十一月以後至隆慶六年五月以前建言廢罪諸臣，吏部備查。中間如果情非挾私，才力堪用者議擬具奏起用。閒住與致仕者如有才識年力尚堪任使曾經薦奉者許一體遇缺推用。（註廿六）

萬曆元年，高拱罷相，張居正當國。維柏時年六十二歲，還朝徵拜前職。上修聖德，勤聖學，飭羣工諸疏，多讜語。（註廿七）

三年正月丁卯，維柏以考察自陳，不允。（註廿八）十月己巳由吏部右侍郎陞爲左侍郎（註廿九）庚午維柏上疏言鬻官之害曰：『近來開納途廣，干進門多。不論行簡，止

較錢幣。清時舉動，混如市肆。公家憑繳，眇如質券。使蹊徑旁通，正途淹塞。白手攘先，積勞躡後。且此曹始之所輸，終之所得，大畧相當。至其倚法虧下，所入何祇十倍。朝廷負鬻貨之名，下民罹剝削之苦。經國若此，非計之得也。卽云歲需爲急，未能據議罷。亦宜姑就今例，再行酌議。加以遙授，益以添註，畀以散秩，不授以親民之職。且足國不在歛財，而在節用。乞勅所司通覈天下周年歲需，度支實數，通融會計，以定經制。』章下，戶部謂歲費不足，全賴開納接濟，未易輕議。上竟是戶部言。（註三十）由此以觀，朝廷之不辨是非，紀綱廢弛可知也。

四年正月丁巳，御史劉臺劾張居正擅作威福，於是張居正乞罷，維柏倡九卿留之。三月丙辰，維柏六十五歲以老病乞休不允。（註冊一）

五年秋九月，首輔張居正父艱訃至，居正乞恩守制。至再三不允。主事沈恩孝進士鄒元標先後疏諫元輔奪情。（註冊二）尙書張瀚以保留問維柏。維柏曰：『國事一時可支，綱常萬古不易。天經地義，何可廢也。』瀚從之而止。居正怒，取旨罷瀚，停維柏俸三月，旋出爲南京禮部尙書。（註冊三）實疎之也。行次潞河，乞骸骨。初維柏以不保留居正，與張瀚同被旨詰責。至十二月，遂遭罷黜。（註冊四）當乞休時，作詩有『樂事尙饒新歲月，勝遊不改舊河山』句。聞者皆贊其胸抱。

罷官後，仍講學於天山草堂，以白沙無欲之說爲宗。以反身一誠爲主。雖理論類白沙，然以一身扶綱常，片言繫九鼎，則尤功在社稷也。優悠林下十一年。仍以地方利益爲念，如西河改水，嘉桂三華諸建置，及省會外城之議，皆身任之，勞怨不恤，以萬歷十五年丁亥卒。（公元一五八七）年七十七。訃聞，神宗惻然。命賜水衡金錢以葬。（註冊五）十六年六月乙卯，賜謚端恪。（註冊六）從祀鄉賢。恩賜牌坊於羊城大市街，表曰：『清朝柱石，』『名世儒宗』所著有易學義、禮經辨、太極圖解、天山草堂存稿，及編陳子言行錄行於世。學者稱古林先生。（註冊七）

### (三) 維柏里籍之考定

粵大記、明史、阮通志、南海縣志、明史稿皆言維柏爲南海人。而三水縣

志則謂其爲三水人。且證明其以嘉靖十年選三水縣貢生。而少時釣遊之地，亦有文字留題。則又似可能爲三水人也。如題縣治八景之三溪印月詩云：『扁舟晚向三溪宿，獨坐遙看秋水生。明月澄江天共遠，雙松孤鶴夜同清。眼中滾滾俱塵夢，海上悠悠非世情。更欲乘槎何處所，扶桑東去卽蓬瀛。』（註冊八）其北江別親友詩云：『孤舟萬里迅宵征，細雨深更寢復興。別岸數聲傳野柝，前灣幾點落漁燈。非才捧檄成何事，多病匡時愧未能。倚枕不勝懷土夢，白雲回首幾千層。』（註冊九）

且維柏少時確曾讀書於崑都山。山在縣城對河三里，上有斥堠，蒼江繞其下。（註四十）維柏有崑都聳翠詩云……吾坐二十載，躡足探孤芳。結茅山南麓，勝事日徜徉。竹門度幽禽，松風韻清商。門戶事探討，默坐澄心腔。冰壺鏡杜溪，翠草交周體。緬然景前哲，亦有崔與張。崔張日以遠，江門浩湯湯。泰山入青徐，歎彼道路長。決策及時早，驅東歷周行。今人亦古人，後生當自強。壯行在幼學，時發貴含章。從龍雲致雨，起鳳天際翔。他年紀勝蹟，茲山詎能忘。（註四十一）

至嘉靖二十七年戊申，維柏成進士後十三年，學政蔣信過崑都山，至維柏讀書處，爲題何子讀書堂一額。（註四十二）且題詩并序云：『古林何子，總角時讀書崑都山麓，與蘭坡老人僦屋半間，編竹爲垣，上覆以茅，僅容一榻。客至無坐處，三面野堂湫陋，人不能堪。何子居之甚適。雨漏則拾竹殼葺補，日夜端默靜坐。壁間書李延平先生默坐澄心，體認天理八字。日顧詭之，至忘寢食。如是者逾年。甫冠乃還故里。閉南軒以專志於學。豪傑之士，無所待猶興。古林子方少時，乃能卓然自如。予嘉靖戊申，偕長沙羅子一岳，蔣子自正輩，自楚逾嶺。與廣中諸同志遊羅浮西樵，道古林子沙潛里。同出三水，訪光遠陸高士，過何子讀書處。蘭坡老人指示故所竹壁，蕭然可想可愛。題曰何子讀書堂，遂賦此詩。』詩云：『古林深處讀書臺，一榻乾坤靜裏開。甕粥自甘清晝永，茅簷長傍野塘隈。潛藏自是蟠龍地，端默由來結聖胎。今日得逢舊棲處，却憐秋早鳳歸來。』（註四十三）

蔣信詩序有道古林子沙潛故里，則維柏當爲南海沙潛人無疑。然則三水志謂其爲三水人何也。復讀維柏賀三水陳候膺賞序，謂嘉靖五年丙戌，三水始設縣，析南海五十六里，高要十五里合而成邑。……析自高要者與予鄉接壤。又語三水父老曰：若

邑吾舊遊。(註四十四)余始恍然，知三水與沙潛接壤，維柏少時嘗勾留於此，寄寓沙南堡。則其以三水籍應試固意中事。以此三水志又認為三水人也。

#### (四) 維柏與嚴嵩

嘉靖二十三年，維柏膺接閩之命。時嚴嵩專政，例當謁辭。嵩囑曰：『爲語方相國，旦夕召矣。宜先治行。』(按方相國即獻夫)維柏對曰：『大臣起用，斷自宸衷。豈臣子所得知。』嵩色沮。(註四十五)

廿四年乙巳二月十二夜，疏劾嚴嵩奸貪。并謂其進顧可學盛端明修合方藥，邪媚要寵。疏內有云：『嵩秉政以來，藉寵而懷奸，盜權而植黨。阿附汚合者，則援之以進用。守正忤已者，則摘之而貶斥。無辜善類，每被中傷。平居物望，動罹譴黜。貪夫黷客，多出其門。爪牙腹心，分居要路。致使外而憑依小人，有懸其像貌，挾勢以縱貪。內而趨附鄙夫，多聽其頤使，濟惡以黨害。恩布私人，氣燄中外。天下徒知畏嵩之奸黨，而不知朝廷之公法。』等語。當其閉院草此疏時，有大鴉百十噪於庭中。翌晨復集。一啄硯池，二立維柏座。維柏祝曰：『吾志已定，且告神明，安敢有負。縱啄吾目，當亦不止。』(註四六)疏入，世宗震怒。

五月乙丑，嚴嵩具疏自辨畧云：『臣之心事，有皇上知之而臣下不及知者。有在廷僚臣知之，而遠方不及知者。皇上聞盛端明通曉藥石，親發玉音，詢其姓名。而維柏謂臣力薦之。顧可學以秋石方書進，有旨令其暫住臣家，臣曾奏請命之別館居住。而維柏則謂臣納而叢之。至謂廟制大典，以皇考孝宗同爲一世，不若從同堂初制之爲安。則臣之妄議也。而郭希顏則欲立廟，於臣言甚相矛盾。而維柏乃謂臣陰主希顏之議。乞將臣罷斥，可學送歸，希顏逮問，庶幾羣疑可釋。』(註四七)上曰：維柏雖曰劾卿，實奸欺巧詐，以伺朕意。豈可中彼之計。令錦衣衛宮校捕械來京訊問。(註四八)

五月乙巳，上召錦衣衛掌衛事都指揮同知陸炳取維柏逆疏。但所司祇將奏本入，而未將啓本入。上召陸炳至無逸殿責問謂：『留此疏與其黨貼鈔何耶！爾衛廝宜嚴察發其奸，何得容隱。』又曰：『維柏雖攻輔臣，實欺訕朕躬。奸邪無道，人皆知之。

自後宜督率官校廉訪，勿得畏避。』(註四九)以貞忠諒直之維柏，而目爲巧詐奸邪。天下寧有真是非可言耶？維柏之首領尚可保耶？當逮捕之詔至閩，城內外老幼男婦，罔不激切奔泣。維柏籠燈作家書及友札云：『臨事就縛，方寸定靜。學易以行，素乎患難，無所悔尤。生平學問，至此頗覺得力云云。』當其由閩逮繫至京師，閩百姓皆棄擔犧呼號攀送，聲震林木。(註五十)所過士庶遮道攀留。緹騎持之益急，諸生大哭擁維柏。維柏謝曰：『此余慮定而後發。人臣之義，自應如是，生何哭爲？』閩中矢爲歌謠數十章，錄其一二云：『三水鳳，參天柏。窮谷深山被恩澤。官穀重重賑饑，奸弊時時痛革。今日去，民心惻。報答無由控訴天，但願天心眷忠益。』『六月天降嚴霜，一柏依然獨挺。眼見嚴霜嵩裂，這柏依然堅勁。好廟堂棟梁，把乾坤重整。』(註五一)

逮至京師，下錦衣衛獄杖一百。司法承嵩風旨，拷掠備至，僅存餘息。語不變。適番禺人陶鳳儀掌衛事，曲衛之。(註五二)而尹都諫子相揣知世宗意稍寬，乞解恩發鎮撫司行杖，得不死。方其由閩赴逮至京就讞也，每有綠色小蠅數百從之，一時咸訖爲異。故有誠徵錄以傳。(註五三)

## (五) 維柏與張居正

萬曆四年正月丁巳，巡按遼東御史劉臺論劾大學士張居正擅作威福，蔑祖宗法。如逐大學士高拱去國不容旦夕。緩成國公朱希祖無邊圉功而贈王爵。引用閣臣張四維及冢臣張瀚，不以廷推。斥遣諫官余懋學，傅應楨，幾空言路。爲一身固寵計，則獻白蓮白燕以爲祥。爲子弟科第謀，則假京堂巡撫以爲報。翰林不侵政事，而創爲章奏考成。江陵膏血已枯，而大起違禁宮室。(註五四)臺之所言，固侃侃也。於是居正四維瀚相繼乞休。

惟維柏以嘉靖以來，君荒於上，臣縱於下。紀綱萬事，皆墮於冥冥之中。居正雖專權任數，然課吏職，明號令，信賞罰，覈名實。確可以挽人心之積玩。乃倡九卿上疏留之曰：『居正身任天下安危，上輔君德，朝講日勤。下礪百僚，政刑時賴。汲汲圖治，不避怨嫌。數年之間，四夷欵塞，百官受成，庶事奏功，萬民率職。皇上冲年御極，而

天下安寧太平。居正輔助之功也。張四維秉志忠貞，才堪謀斷。亦以人言，杜門求退。機務繁重，必勞聖心，乞宣諭二臣卽出視事。』(註五五)

及五年九月，居正喪父。戶部侍郎李幼孜首倡奪情起用之說。而司禮監馮保亦不願居正去。中旨又令張瀚諭留之。居正復自爲牘諷張瀚，又令客說瀚，更傳旨責瀚久不奉詔無人臣禮。廷臣知居正欲留也，惴恐交章留之。(註五六)當此衆士諾諾之秋，維柏不顧一切，獨以綱常大義勉張瀚，甘罷官而不怨。同一居正也，前則乞留之，後則不爲保留。所謂對事不對人，以公不以私。邪正之分如此。

## (六) 維柏與東粵勝流

### (1) 與滿若水

維柏選貢生後，未成進士前。卽嘉靖十一年至十三年間，讀書西樵古梅洞。若水亦講學此間，往來甚契。維柏嘗出洞，期以冬至日復來。若水有送其出洞詩云：『送君出洞去，信手閉三關。君有陽和約，一陽來復還。』(註五七)

維柏別後，若水用前韻見懷云：『猶疑顏色在，曉月照松關。浩歎草黃落，王孫遊未還。』(全上)觀上二詩，知二人交誼之篤，與流連愛慕之情

至嘉靖二十六年丁未，維柏以劾嚴嵩被黜後，亦曾於三月二十日小住西樵。若水有和詩云：『城宿寧非寂，山泉亦是喧。要知喧寂處，動靜此心然。』(全上)

(按)若水字元明，增城人，生於明憲宗成化二年，卒於明世宗嘉靖三十九年。少從陳白沙遊。弘治末登進士，授編修。嘉靖間，歷南京兵部尚書。王守仁在吏部講學，若水相與應和。著有甘泉文集，學者稱甘泉先生。

### (2) 與龐尙鵬

隆慶初，維柏被召還朝。其門人徵尙鵬作序爲贈。尙鵬謂『公執義侃侃，孟賁不能奪。而審權宜以通變，從善如轉圜，天下咸以公之出處卜世道之汚隆。』(註五八)

及萬曆初，維柏赴召還京。尙鵬有詩贈之云：『聖主臨軒訪老臣。卻教黃髮御蒲輪。今逢海宇重新日，誰是乾坤獨立人。北斗才名留畫省，東山經畧獻楓宸。爭看司

馬還朝好，莫厭都城萬騎塵。』(註五九)

至萬歷五年，維柏以忤張居正罷尚書，尚鵬又有詩寄之。見百可亭摘稿詩集上頁七。太長不錄。

(按)尚鵬字少南，南海人。嘉靖癸丑進士，累官至監察御史，左副部御史。生平忠介有胆畧。官兩浙時，有請均徭役杜偏累一疏。後遂通行爲一條鞭法。海內尤利賴焉。天啓初，賜謚敏惠。

#### (3)與龐嵩

嵩訪維柏南昌別業，有詩見懷云：『柚子環堤屋後松。南陽今見此遺踪。入門看竹驚眠犬，步澗瞻雲憶見龍。濁酒不妨同伴酌，彈冠休羨笑相逢，天關夜夜天山夢，欲叩同人大覺鐘』(註六十)

當隆慶初，維柏聞被召之報，有述懷詩五言律。嵩有和作首二首。錄其一云：『爛練階前舞，綸音日表來。周邦良翰喜，鐵面綉衣回。孝重光前烈，猷需濟世才。獨憐狂簡在，吾黨向誰裁。』(註六一)

又有發江滸留別古林又一首(註六二)贈何廷尉北上一首(註六三)不錄。

(按)龐嵩字振卿，南海人。嘉靖甲午舉人，官至南京刑部員外郎。以善政聞，人號龐青天，出任曲靖知府，刻同文編。以三種夷字行鄉約保甲以變夷俗。其學初出王守仁門下，後從湛若水遊。著有弼唐存稿等。

#### (4)與霍與瑕

隆慶元年三月廿七有和古林先生聞報之作五律四首。(註六四)步韻送何古林先生北上七言絕詩八首(註六五)有用古林先生烟樹賦意奉贈，調寄減字木蘭花詞一首(註六六)均不錄。又有送何古林先生北上調寄最高樓詞三首，今錄一首云：『羨鄉里，鄉里後來賢。誰道不如前。圖書光霧還相接，乾坤五百是何年。並馳驅文獻，駕菊坡鞭。看北斗七星何朗耀。看華岳諸峯何峻峭。風清地。月明天。好將湖海憂廊廟，莫辭將相作神仙。盼河清，圖負馬，鳳驅驥。』(註六七)

又有奠何古林老先生文，會祭何古林先生文。(註六八)不錄。

(按)霍與瑕，字勉齋，南海人。韜仲子。嘉靖己未進士。歷官至江西饑憲。與海瑞

齊名。世多其風節。

(5)與黃佐

維柏以劾嚴嵩罷官後，歲月多閒。嘉靖四十三年甲子三月，黃佐有同維柏登玄覽臺詩七律云：『此日登臺笑語時。依然雲影在江湄。閒雲出岫真何意，逝水如斯豈自知。世道行藏惟與爾，舞雩童冠更須誰。臺前多少凌霜樹。一任和風取次吹。』(註六九)

(按)黃佐字伯才號泰泉生於明孝宗弘治三年，卒於明世宗嘉靖四十五年。嘉靖間進士。授編修。擢少詹事。與大學士夏言論河套事不合，尋罷官，與諸生講程朱之學，著樂典等四十餘卷。

(6)與區益

當維柏萬歷應詔還朝，益有詩送之云：『古來獻納重蘭臺。五色花箋日下裁。地切西清分雨露，文從北斗仰昭回。銅龍曉闢黃封入，金馬朝回錦帙開。滿袖爐煙隨染翰，恍如雲氣下蓬萊。』(註七十)

(按)區益字叔謙，高明人。嘉靖庚子舉人。任都昌，慶遠知縣。溫州益州知府。著有阮溪草堂集。子大樞大相大倫均有名。

(7)與陳遷

維柏萬歷五年後，罷官歸里。曾祀河神，招故人同飲河上。陳遷有詩云：『新辭黃閣近臣班。駐馬長堤春思間。八坐風雲連北極，三城煙樹擁南山。丹梯萬丈塵區外，綠水孤帆夕照間。促席遠招巖下客，吟餘白雪出松關。』(註七一)

(按)陳遷，南海人。嘉靖丁酉舉人，官潯州知府，著有代奕編。

(申)與黎瞻

當隆慶初年維柏被召還京，黎瞻有送何古林待御應召五排云：『溫室宣遺詔，邇方起舊臣。賜環彰睿眷，錫命越朝紳。詩社辭仙嶠，樓船起海濱。鳳麟天下重，龍蠖一朝伸。昌運開堯歷，崇階陟漢津。廣南增士氣，極北轉鴻鈞。允矣當名世，夔然可并論。』(註七二)

(按)瞻字民仰，番禺人。領嘉靖壬午鄉荐。授國子監助教。以參豪貴致仕，著有燕台集。

## (七) 維柏與西樵山

維柏以嘉靖十一年癸巳，讀書於西樵山之石牌村。村上有梅花館，即其故地。溪畔多梅，冬月香滿幽谷（註七三）石牌峯上有何子讀書臺，即維柏讀書處（註七四）。時甘露降於石泉者連三日，溝若水以爲瑞鍾維柏。（註七五）王漸達贈以詩云：『同德之磋，如氣之和。同心之涵，如露之甘。』（註七六）

其西樵山居詩云：『鳥向樓前語，花當檻外明。閑來無一事，心跡淡雙清。』（註七七）

又春日偕弟姪遊西樵詩云：『采芳猶及暮春前。路入桃源洞裏天。幾片落花臨釣石，數聲啼鳥破朝煙。回看世界真如幻，每到林泉似有緣。欲識舞雩童冠樂，且隨花柳過前村。』（全上）

至廿六年罷官後，復返西樵。其未至而望西樵有詩云：『不到樵山久，寒松幾度秋。遙知湖上月，長照紫雲樓。』（註七八）（按紫雲樓，方獻夫讀書處。）

歸泊官山墟，橫舟水澳。有詩云：『官山山下水西頭，楊柳津前綠蔭舟。海內風濤多不定，未應長笑獨臨流。』（註七九）

其抵西樵後有紫雲樓夜雨書懷云：『夜坐西樵百尺樓。忽驚風雨起春愁。十年回首論心地，寂寞寒燈數舊遊。』（全上）

及其山居無事，佳日尋山。有西樵道中詩云：『勝日尋芳上翠岑。鳥啼花落總春心。杖藜到處有真樂，松嶺招雲一徑深。』（全上）

久別樵山，自多感觸。其偕陳黃門崔民部陸孝廉遊樵經梅花館詩云：『十年重約此登臨。千里良朋來盍簪。龍洞水從雲谷轉，虎臺花護翠岩深。論心夜對青山月，攬勝朝探碧玉林。偶過舊時壘粥處，松梅猶傍草堂陰。』（註八十）

山行而經方獻夫山居有詩云：『五龍深處相公家。樓閣連空鎖暮霞。門外久荒車馬跡，庭前猶放木樨花。』

其偕鄧德昌王漸達諸子登伏虎臺有詩云：『乘高步石臺，况復值佳節。悠悠媚茲幽，天空真境徹。孤雲不可屬，衆芳逞奇絕。涼飈萬壑生，佳氣千峯列。矯首縱遐觀，

知心幾賢傑。我與二三子，青山有真訣。萬里秋色深，相看共明月。』

其西樵月夜感舊有詩云：『萬丈松風吹客衣。月明山色望霏微。石泉洞古春長在，雲谷天空鳥自飛。此日登臨仙犬吠，十年蹟跡主人非。巖花似領無言意，且向樽前一詠歸。』

維柏既服膺白沙之學，其詩亦酷肖白沙。有春意盎然，舞雩歸詠之趣。如杖藜到處有真樂，水流花落總春心。石泉洞古春長在，雲谷天空鳥自飛。皆有怡然自得之妙，不求工而自工。至於『天空真境徹』、『青山有真訣』諸句，皆道味悠然。置諸白沙集中，不能辨別。朱彝尊謂『維柏詩多雜講學語，合格者希』（註八十一）而顏應雷則謂其詩：『冲淡雍雅，趣味天然云。』（註八二）

## （八）維柏之理學

四庫全書天山草堂存稿提要謂：『文集中有講義語錄二種，皆以白沙諸論爲宗，其詩亦多講學語，蓋維柏嘗從獻章遊。此則紀昀之失考也。（註八三），考白沙卒於明孝宗弘治十三年庚申（公元一五〇〇）。而維柏生於明武宗正德六年辛未，（公元一五一）。是白沙卒後十一年維柏乃生，斷無從遊白沙之事。然維柏確私淑白沙者。萬曆十一年癸未冬，維柏七十二歲，曾泊舟江門謁白沙居里。有詩云：『夢寐江門意獨深。扁舟南下歷江潯。黃雲影裏千峯靜，碧玉樓中萬古心。吾道淵源真有自，釣臺風月尙堪尋。凭闌極目遙天外，欲扣漁歌和此音。』（註八四）所謂吾道淵源即指學宗白沙也。

已而維柏偕陳吾德行釋尊禮。白沙孫觀光等奉遺像設位爲祭。禮成，歷觀舊廬臺，鞠爲茂草。樓半傾圮。大令豐城袁奎至邑，相對太息。有改建之議。以癸未冬（十一年）定度審式，上爲碧玉樓，楚雲台。（註八五）是維柏對改建白沙祠有功也。

維柏二十歲以前，即探討聖賢心性之學，澄心靜學於崑都山。二十四歲釋褐後居京師，亦立一會與海內有志之士研究。其學以無欲爲宗，以主敬立誠爲主。其答弟子問主敬之功曰：『禮曰毋不敬，詩曰思無邪。能敬便是心有所畏警，有畏警則朝乾

夕惕不敢放，而此心常存。心存便無妄想，自然周匝無遺。』（註八六）

其爲學重實行，教人不可好高騖遠，而忽畧庸常。讀書不可於訓釋字義上求之，而於忠孝篤敬處求之。謹言慎行，直內方外，便是得力處。（註八七）

維柏曾與龐嵩劉模等立詩易會。春王正月有辨，格致有說，學庸有疑，太極有解，得觀摩之益甚多。（註八八）相勉以克念格物，直探本源。學易寡過，能遯而亨。（註八九）

其態度洒然，無滯於物。不言而飲人以和。（註九十）惡煩言之害道，而勉人反求諸己。又謂學莫嚴於義利之辨，而名實之審也。名勝恥也，實勝善也。（註九十一），故概括言之，其學以默坐澄心爲入門，以孝弟力行爲證道，以至誠無欲爲究歸。實白沙之流派也。

## （九）天山草堂存稿

天山草堂存稿八卷，四庫全書總目卷一百七十七有著錄。謂是集文六卷，詩二卷。而明史藝文志則作二十卷。阮元通志藝文畧注存。大約此書清初已不易得。番禺徐君信符，搜求廣東文獻遺著數十年，亦未見此書。民國三十二年癸未，倭人踞粵，詩書灰燼。順德溫氏藏書亦散出，其中有手鈔本天山草堂存稿。徐氏卽斥資購歸。喜而不寐。時余隨嶺南大學遷校曲江，徐氏馳書相告。及三十四年勝利言歸，徐氏卽持此書相示。書頁有硃絲闕，其格紙書口刊天山存稿，沙潛何氏家藏。沙潛爲維柏鄉祠所在，此稿想藏於祠堂，後乃散出。清初時當由何氏後人根據萬歷刻本而鈔。但鈔時明刻本已多殘缺，故每本均有缺字缺頁。並在目錄中注明閩本原缺。知此書清初已不易覲，况歷二百餘年後乎？祠堂所藏鈔本復多蛀口，殘蝕已甚。且僅得五卷。卷一奏疏。卷二地方事宜。卷三雜著，講義，語錄。卷四卷五序。較之四庫著錄八卷本尚欠三卷。

卷首有萬歷十二年甲申七月東海顏鯨序。蒲凝重跋。萬歷癸未閩順昌人楊烈序。楊序畧云。『……自丁丑（萬歷五年）撫隅燕邸，非久南旋。是夏徂秋，日侍天山草

堂。同門聚萃質問之暇，若羣飲江河未足也。會鄭生用淵，黃生樸，洗生效，羅生汝儒輩，各出所蓄手錄若干。因懇先生令子崇亨，崇慶，崇京出所敬藏若干，復遍蒐旁輯於舊往來者，稍稍比彙，裒成編帙。命曰天山草堂存稿。然亦散佚於什伯之餘，所存僅僅一二耳……』

據楊烈序，則此書當刻於維柏生前。稿從草堂彙合也。

## (十) 天山草堂之沿革

### (1) 法性寺之天山草堂

草堂初假城西法性寺之訶林。據岩窩易會說謂嘉靖二十六年丁未秋。維柏以忤嚴嵩歸，筮易得遯之上九。遂卽雲澗小窟扁曰天山草堂，日與學子遊息討論其中，謂之雲窩易會。日乾夕惕。察見天則念念而不滯於念，是謂克念。應物而不過乎物，是謂格物。參悟名理，直參本源。又數年而同志舊友劉素予歸自梓潼，陳唐山歸自鍾祥，鄒五嶺歸自海寧，龐弼唐歸自滇南。千里懷人，一時并合。遂過草堂相與訂析易義，月爲三會。越二年而霍勉齋歸自四明，林艾陵便道過此，咸來預會。友朋雲集，雲澗小窟，不便分席。遂從東北隅住持僧岩窩方丈南有容蹟亭，乃曩日惠陽葉生伯仲所館處。茂樹嘉葩，清馥可人。鳴禽上下，情景俱適。會之日正襟危坐，焚香展易，儀對三聖。爰稽傳義，析疑訂是，究竟精蘊。觀象得意，漸入忘言。旣而散帙舒談，鼓瑟投壺，把酒賦詩。各極興趣。有時擊磬招僧，而岩窩輒具茶果入座。時有好顏容。(註九二)據此則草堂初爲易會，假容蹟亭集會者也

### (2) 天山草堂之取義

或問草堂扁天山何義？維柏作天山草堂說答之。大意謂自讀易以來，靜觀盈虛消息之理，吉凶休咎之幾，自嘉靖二十四年乙巳夏被召逮，幸歸舊廬。所筮推塞與困及否各得其一，餘皆遯卦。遯者示退避之象也。天崇高而莫及，山重厚而不遷。自天而下，惟山特立。於中有艮止之象。且自姤而遯，三陰凌長，小人日衆，君子日消。幾兆已形，蓋將入於否。時而止而遯之矣。計處遯避之時二十年來，惟此卦迭示。因服

膺而弗失，守敬而無爲。出入以度，如臨師保。決志退遜，無所系戀。悠然順適，無所凝滯。俾知學易寡過之義也。扁堂之名，義取於此。(註九三)

### (3) 河南小港之天山草堂

法性寺初期之天山草堂，僅扁上之草堂而已。假容躋亭爲易會集合地。月僅三會，來者多大人先生及致仕宦達，純爲文人集會性質，而非講學性質。來會者朋友爲多。及後四方人士，慕名來學者衆，區區之容躋亭不足以容之。維柏乃闢河南小港勝地爲天山草堂以處學子。此則有建築有規模有組織有學生之正式天山草堂也。且已有學生六十餘人。據維柏題春風萬里圖卷贈郭孔瞻謂孔瞻應試北上，同學置酒送之。因以萬歷元年正月七日，爲題春風萬里圖卷。當時同學天山者六十餘人。前後舉於鄉者三十餘人，第進士者十餘人。其教學生之宗旨曰：『學子之於學也，猶農夫之於田也。修禮以耕之，陳義以種之，講學以耨之，本仁以聚之，播樂以安之。有事而匪懈，優遊以俟成。』(註九四)天山以聖賢之道教人，宜其成就之大。况維柏寢饑其間二十年，安身立命以之，傳道講學以之，宜與天關石泉並美矣。龐嵩弼唐遺稿卷二有林先生擢恩教諭序云：『吾鄉古林何文，講學於天山之草堂。某亦忝主灑掃於天關之館。各有期會。期至則諸同志諸從學往來質疑，期不詭於聖賢中正之極。』其所謂同志即朋友，其所謂從學即學生。是知維柏講學，聽講者兼朋友與學生也。

## (十一) 天山草堂之記載及其他

夷考記載，皆以河南小港之勝地爲天山草堂。從無記及法性寺所扁之草堂者。蓋後者確非有規模之草堂也。茲將記載之摯摯大者，畧引於後：

### (1) 粵大記14:20

『維柏家居，發明白沙宗旨，名其居爲天山草堂。又闢河南勝地爲天山書院，以處從遊之士。』

### (2) 乾隆羊城古鈔7:13

『天山草堂，明禮部尚書何維柏建。在河南何庄。又名古林庄。維柏懸車講學之所。今

改爲尚書祠。』

(3) 道光阮元廣東通志 218:28

『天山草堂在河南古林庄。明尚書何維柏建爲懸車之所。即今尚書祠。』

(4) 宣統番禺縣續志 40:10

『天山草堂在河南古林庄（即今小港）明禮部尚書何端恪公講學處。學者稱古林先生。後改爲尚書祠。清康熙間，以祠改建是岸寺，宣統元年在籍前湖北按察使梁鼎芬倡議集資於寺旁隙地復建祠宇，仍顏曰天山草堂。』

其他記載之關於是岸寺雲桂橋發祥坊者摘錄如下

(1) 是岸寺

宣統番禺縣續志 41:16『是岸寺在河南小港。爲明何端恪公天山草堂遺址。國朝康熙間，中州楊天祥爲僧上達改建。凡閱十有三年始落成。有康熙二十九年兩粵總制吳興祚及三十一年僧上達二碑。初名是岸庵。道光間，鎮粵將軍奕湘題額曰是岸寺。背山臨流，復有迴廊曲徑，擅幽折之勝。』

民國後，以是岸寺屯軍。至十三年甲子十一月，因製槍彈爲炸藥所燬。但存四壁，其中兩碑，今皆崩裂，不能拓矣。（採訪冊）

(2) 雲桂橋

嘉慶三年戊午重修小港雲桂石橋石路碑記擧本：『雲桂橋乃前明萬歷十年何庄天山草堂何古林公所建。』

(3) 發祥坊

同治番禺縣志 17:34『雲桂發祥坊，在小港橋頭。爲尚書何維柏建。』

## （十二）天山草堂之題詠

(1) 何維柏

維柏講學於天山草堂者二十年。且爲建雲桂橋發祥坊，其裨益於小港鄉者甚大。而其留戀於此鄉之風景者亦可知。集中有天山草堂與楊貞復論白沙之學七絕四

首云：『柳堂竹塢覩風輕。日午黃鸝深處鳴。讀罷草堂無一事。樽前閒對水雲清。』天山洞裏徑森森。白日清樽對綠陰。雲影山光看不厭，幾人知道洞天深。』『江門風日此樽前。吟弄俄經五十年。少壯光陰莫虛擲，好從端默契心傳。』『杖藜隨處是天台。更喜劉郎此地來。共訪仙源莫歸去，山城今有楚雲臺。』（註九五）

#### （2）龐嵩

天山草堂復投壺禮，嵩喜其近於古也，作七言律詩云，『投壺盤辟短長歌。翹首風猷渾未磨。奏鼓已曾宗魯薛，奉觴猶自洽中和。高天煥揭揭搏桑日，巨海源通星宿河。要識三千皆峻極，覺來宗住是誰多。』（註九六）

嵩又曾避暑於天山草堂，有詩云：『六月炎荒凝凍雪，天山池館枕幽城。已無酷吏階前擁，時有故人天上迎。竹葉影侵詩骨瘦，柳梢柔颺葛衣輕。出門咫尺驅馳地，便有炎涼幾世情。』（註九七）

（按）草堂有竹有柳，有池館，有餘齋可供避暑。其非蕞爾之容蹟亭可知也。

#### （3）潘有爲

有爲詠天山草堂詩云：『取象天山闢講堂。括囊彈草挾秋霜。白沙身後誰餘子，徒倚春陰憶面牆。』（註九八）

（按）有爲字卓臣，號毅堂，番禺人。生於乾隆八年癸亥。以乾隆三十七年成進士，官至內閣中書。嗜金石，精鑑古。詩與張錦芳、馮敏昌齊名。道光元年辛巳卒。著有看篆樓古銅印譜。

#### （4）何秉禮

小港離五村約二里。秉禮經五村過古林庄訪天山草堂遺址有詩云：『五村村畔一庄偏。深柳秋亭認講筵。古壁天山留遙蹟，空階風月印心傳。鯤鵬奮翮三千土，獮豸藏口二十年。獨惜此塵終大隱，江陵良相亦妨賢。』（註九九）

（按）秉禮字筠甫，又號約堂，順德人，與何太青同時。選嘉慶己酉拔貢。歷陽江、溪陵、水化州儒學。著有約堂詩存。

#### （5）趙均

小港離瑤頭鄉亦約二里。從小港度雲桂橋便抵瑤頭矣。胡蔚巖及伍梅村香皋兄

弟於中秋後三夕邀均經小港往頭瑤頭步月，均有詩云：『……人影亂石梁，激濺泉聲疾。覽物忽懷古，花田變阡陌。天山留草堂，至今亦蕭索。學士與美人，生年不滿百。石火光中身，及時須行樂。沽酒入瑤頭，驚龍吠剝啄。』（註九九）（按石梁即雲桂橋）

均於立夏後二日又偕伍平湖南洲兄弟，張默遲 謝退谷 麥南村 黎楷文同遊是岸寺有詩二首，錄其一云：『一棹乘潮去，言尋彼岸登。石梁連碧草，松徑罩紅藤。入畫供倪瓈談禪訪慧能。是誰空四大，清磬出雲層。』（註一百）

（按）均字國章，又字平垣，嘉道間人。順德副貢生，署羅定州學正，饒平豐順揭陽教諭。著有自鳴軒吟草。

#### （6）陳曇

其天山草堂詩云：『投効歸來自慨慷，彈章字字喰秋霜。懸車重集生徒盛，取象天山闢草堂。』（補南海百詠）

（按）曇字仲卿，番禺人。生於乾隆四十九年，卒於咸豐元年。屢試不售。歲晚以貢生任澄海訓導。工詩及駢體。慕鄒魯之爲人，因顏其齋曰鄒齋。著有海騷十二卷，咸遇堂集十六卷，鄒齋雜記八卷。

#### （7）譚襄雲

其訪天山草堂遺址詩云：『一上批鱗疏，風前勁草知。歸田成小隱，講學信名師。樹長昌華苑，苔深是岸碑。祠堂名祀肅，風雨颭靈旗。』（三策草堂詩鈔：3）

（按）襄雲字芝林，湖南湘鄉人，由舉人議叙知縣。光緒八年到粵候補，時年已五十四歲，當生於道光廿九年。

### （十三）梁鼎芬與天山草堂

番禺梁鼎芬字星海又字節庵，生於清文宗咸豐九年己未。光緒六年進士授編修。官京師。時李鴻章爲首輔，秉國政者三十年。勢傾中外。光緒十年甲申，法逼安南，鴻章與訂天津和約，爲外交屈服之一。鼎芬年僅二十七，以四月十日上封事劾鴻章，并作詩謂其：『肆然挾敵成禍胎，惟此可斬不須猜』。（註一〇一）天下震其直。旋以

妄劾降五級。張之洞督粵，聘主廣雅書院講席。署兩江復聘主鍾山書院講席。鼎芬後擢湖北按察使，奏請化除滿漢界限。三十二年入覲，面劾慶親王奕劻通賊。又劾直隸總督袁世凱權謀營私。下詔訶責。罷官南歸，以何維柏之劾嚴嵩自况，遂倡修天山草堂。番禺盛景璿，陳俊民資助之。余於景璿子鵬運處得見羅照滄所繪圖，有鼎芬題記云：『己酉之春，余自楚歸。吾季瑩（景璿字）九弟俊民諸君，商議小港重修天山草堂爲何端恪公祠。於祠後置余讀書處。樓館深明，花樹芳雅。請羅太常圖之，以一份貽季瑩。世變大矣，其間興亡生死離合之故，尤不可言也。豈不悲哉！鼎芬記於鴨知橋』。

（按鴨知橋即雲桂橋，鼎芬改以雅名。鼎芬題此圖，距天山草堂初建凡五百五十年。）

羅照滄題云：『天山草堂圖，明南海何端恪公講學故址。己酉梁節庵按察乞病回里。同人於其地建祠，後一層以居節庵。乙卯九月（一九一五）南海羅照滄攜門人陶原圻梁家聰測繪并記。』

己酉九月，鼎芬以張之洞喪北上。翌年庚戌鼎芬仍在武昌。六月六日有口占一詩云：『眼前兒女在他鄉。心在天山新草堂。二頃荷花千畝竹，今朝拋了好時光。』（節庵遺詩5:34）

庚戌八月有四用鷗字韻寄懷季瑩并懷草堂諸子云：『病霜盈鬢最驚秋。才劣輸君更幾籌。菊力於人無一日，柳風在世散千愁。李崔詩筆曾題鶴，皮陸交情互答鷗。負盡草堂連夜月。夢中笑友勝靈洲。』（節庵遺詩5:26）

庚戌十一月，鼎芬南歸，適草堂落成，鼎芬與同人倚欄拍照。題曰：『斜陽衰柳，如此欄何，問吾庵九弟。』蓋自比於辛稼軒，乃用其休去倚危闌，斜陽正在煙柳斷腸處詞意，作題語以貽盛景璿，非泛泛之言也。

小港雲桂橋附近風景極佳。有石堤蜿蜒長數十丈，兩旁夾植水松，蒼蔚參天。當時東莞陳伯陶，番禺潘飛聲，吳道鎔，汪兆銓，汪兆鏞諸名流，咸以暇謙遊於此。令人想見老輩風流。摘錄數詩於後：

（1）汪兆銓：庚戌十一月節庵自武昌歸，次日同訪天山草堂，爲明何端恪公故居，地鄰是岸寺，寺鞠爲茂草有年，朋舊重葺爲節庵著書處。節庵今歸適落成，因紀以詩云：

『先正流風迴未遇。故居同訪水之涯。虛堂重構分僧舍，遠客初歸感鬢華。合有淵源留諫草，可憐零落到梅花。著書養病江鄉好，應伴閒來共飲霞。』(惺默庵詩鈔:4)

(2) 陳伯陶:過天山草堂懷梁節庵云:

『草堂招隱有羊求，長夏江村遲放舟。聞道新巢來海燕，更開旁舍狎沙鷗。臺深莫使芭蕉翳，山小偏宜桂樹幽。傳語五噫居廡客，武昌魚好莫勾留。』(註一〇二)

又有重過天山草堂懷梁節庵云:『城中坐炊飯，納涼入江鄉。扁舟弄早潮，的的涵星光。飄颻不覺遠，忽復登草堂。堂前桂未花，堂後菊已荒。不見堂中人，獨立心彷徨。開軒挹朝爽，清露涵方塘。滿滿冰雪色，洗我熱中腸。願言念君子，遠在天一方。何時理歸棹，散髮同徜徉。』(全上)

(3) 潘飛聲:天山草堂消夏次陳子礪提學云:

『勞人畏酷熱，逭暑尋吾鄉。水松遠招客，樹樹涵秋光。乍息塵中鞅，喜登江上堂。主人尚行邁，三徑幸未荒。攤飯展書冊，便欲儕羲皇。松蘿洗筠席，荷風遞芳塘。不知日卓午，但覺衣自涼。簷際一聲鐘，隨花落上方。』(註一〇三)

飛聲又有與梁節廉訪遊岸寺訪天山草堂遺址云:『閒身重約舊湖雲。讀畫攜樽到日曛。江漲松疑天上種，寺深鐘隔水中聞。白鷗飄蕩能招我，黃鶴歸來恰似君。偏喜病翁題健藥，草堂一席可容分。』(註一〇四)

(4) 吳道鎔:遊天山草堂懷何端恪公兼簡梁節庵同年云:

『名節乃道之藩籬。江門學派一線遺。卓哉何端恪，後起能相師。安南之征宮寺役，逆鱗屢疏批丹墀。顧盛邪媚安足道，老奸首擊嚴分宜。江陵觥觥奇男兒，豈不心許能救時。情所自致自奪之。愛人以德君子事，天經地義何委蛇。夜光按劍亦怪事，一笑歸臥珠江湄。釣台風月竟無塵，天山林木寒有枝。吁嗟乎江門學派一線遺。卓哉何端恪，曠世誰相師。』(註一〇五)

(5) 汪兆鏞:訪明何端恪公天山草堂故址云:

『草堂久闌寂，鳴琴想林側。釣磯淡霞莢，樵徑蔭松櫟。游目愜幽曠，聒耳遠塵埃。意一登覽，杭章僅咫尺。……』(註一〇六)

(6) 易順鼎

庚戌正月十五乘舟至小港看桃花并遊天山草堂詩云：

『數點閒鷗傍釣磯，春寒尚少燕飛雙。花花葉葉愁如海，雨雨風風客渡江。似杜懷高人日酒，如王訪戴雪天艘。前賢靈爽知應慰，空谷蕭寥有足證。』(麥志樓詩 53)

#### (十四) 結論

維柏秉性忠饑，知有國而不知有身。嘉靖十六年，以諫遠征安南及沙河行宮金山寺工作而忤上。嘉靖廿四年以劾嚴嵩奸貪，黜辱幾至於死。萬曆四年，以忤張居正復遭罷斥。其直諫一再而三，幾與服官相終始。豈不知苟合取容足以長保富貴哉！惟道器爲能慷慨赴義也。余主講嶺南大學，每與諸子誦維柏之爲人。休沐之暇，輒相與信步小港，流連草堂。先哲遺風，彷彿尚在。草堂前臨江渭，後繞樵徑。水松招我，沙鷗傍人。松櫞菊桂葭菼之屬，一一在眼。抗戰歸後，重覓遊蹟。則天山草堂已夷爲體育場，是岸寺亦毀拆太半，無復上方鐘磬之音。又不勝今昔之感矣。余草此文，所以表忠貞，亦欲以溯陳迹也。

一九五〇年十月廿日脫稿於嶺南大學之琅玕館。